





白氏長茂集

可心甲

白氏文集卷第十五

律詩

五言七言自兩韻至一百韻九十九首

渭村退居寄禮部崔侍郎翰林錢舍人詩一

百韻



聖代元和歲間居渭水陽不才甘命舛多幸遇時康
朝野分倫序賢愚定否臧重文踈卜式尚少棄馮唐
由是推天運從茲樂性場籠禽放高翥霧豹得深藏
世慮休相擾身謀且自強猶須務衣食未免事農桑
薤草通三徑開田占一坊晝扉肩白版夜碓掃黃梁
隙地治場圃閒時糞土疆枳籬編刺夾薤壟擘科秧
穡力嫌身病農心願歲穰朝衣典杯酒佩劒博牛羊
困倚栽松鋪饑提採蕨筐引泉來後澗移竹下前岡

生計雖勤苦家資甚渺茫塵埃常滿甌錢帛少盈囊
弟病仍扶杖妻愁不出房傳衣念檻樓舉案笑糟糠
犬吠村胥鬧蟬鳴織婦忙納租看縣帖輸粟問軍倉
夕歇攀村樹秋行遶野塘雲容陰慘澹月色冷悠揚
蕎麥鋪花白棠梨間葉黃早寒風撼撼新霽月蒼蒼
園菜迎霜死庭蕪過雨荒簷空愁宿鷺壁閣思啼螿
眼爲看書損肱因運甕傷病骸渾似木老髮欲成霜
少睡知年長端憂覺夜長舊遊多廢忘往事偶思量
忽憶煙霄路常陪劍履行登朝思檢束入閣學趨蹌
命偶風雲會恩覃雨露霽沾枯發枝葉磨鈍起鋒鋌
崔閤連鑣驚錢兄接翼翔齊竽混韶夏燕石厠琳琅
同日升金馬分宵直未央共詞加寵命合表謝恩光

厩馬驕初跨天厨味始嘗朝晡頒餅餌寒暑賜衣裳
對秉鵝毛筆俱含鷄舌香青縑衾薄絮朱裏幕高張
晝食恒連案宵眠每並床差肩承詔旨連署進封章
起草偏同視疑文最共詳減私容點竄窮理折毫芒
便共輸肝膽何曾異肺腸慎微參石奮夾密學張湯
禁闥青交瑣官垣紫界牆井欄排齒齒簷瓦閉鴛鴦
樓額題鳩鵲池心浴鳳凰風枝萬年動溫樹四時芳
宿露疑金掌晨暉上璧璫砌筠塗綠粉庭果滴紅漿
曉從朝興慶春陪宴栢梁傳呼鞭索索拜舞珮鏘鏘
仙仗環雙闕神兵闕兩廂火翻紅尾旆冰卓白竿槍
滉漾經魚藻深沉近浴堂分庭皆命婦對面即儲皇
貴主冠浮動親王轡開裝金鈿相照耀朱紫間熒煌

毳簇桃花綺歌巡竹葉觴窪銀中貴帶昂黛內人粧
賜禊東城下頌酺曲水傍樽壘分聖酒妓樂借仙倡
淺酌看紅藥徐吟把綠楊宴迴過御陌行歇入僧房
白鹿原東郭青龍寺北廊望春花景暖避暑竹風涼
下直閒如社尋芳醉似狂有時還後到無處不相將
鷄鶴初雖雜蕭蘭久乃彰來燕隗貴重去魯孔恓惶
聚散期難定飛沉勢不常五年同晝夜一別似參商
屈折孤生竹銷摧百鍊鋼途窮任憔悴道在肯徬徨
尚念遺簪折仍憐病雀瘡卹寒分賜帛救餒減餘糧
藥物來盈裹書題寄滿箱殷勤翰林主珍重禮闈郎
煦沫誠多謝搏扶豈所望提携勞氣力吹簸不飛揚
拙劣才何用龍鍾分自當粧媠徒費黛磨甌詎成璋

習隱將時背干名與道妨外身宗老氏齊物學蒙莊
踈放遺千慮愚蒙守一方樂天無怨歎倚命不助勦
憤懣胸須豁交加臂莫攘珠沉猶是寶金躍未爲祥
泥尾休搖掉灰心罷激昂漸閒親道友因病事醫王
息亂歸禪定存神入坐亡斷癡求慧劍濟苦得慈航
不動爲吾志無何是我鄉可憐身與世從此兩相忘

酬盧秘書二十韻

時初奉詔除
贊善大夫

謬歷文場選慙非翰苑才雲霄高蹇致毛羽弱先摧
識分忘軒冕知歸返草萊杜陵書積蠹豐獄劒生苔
晦厭鳴鷄雨春驚震蟄雷舊恩收墜履新律動寒灰
鳳詔容徐起鵷行許重陪衰顏雖拂拭蹇步尚徘徊
睡少鐘偏警行遲漏苦催風霜趁朝去雨雪拜陵迴

上感君猶念傍慙友或推石頑鑄費力女醜嫁勞媒
倏忽青春度奔波白石頽性將時共背病與老俱來
聞有蓬壺客知懷杞梓材世家標甲第官職滯麟臺
筆盡鉛黃點詩成錦繡堆嘗思豁雲霧忽喜訪塵埃
心爲論文合眉因勸善開不勝珍重意滿袖寫瓊瓌

題盧秘書夏日新栽竹二十韻

湘竹初封植盧生此考槃久持霜節苦新託露根難
等度須當砌踈稠要滿欄買憐分薄俸栽稱作閒官
葉剪藍羅碎莖抽玉琯端幾聲清泚漚一簇綠檀欒
未夜青嵐入先秋白露團拂肩搖翡翠熨手弄琅玕
韻透窓風起陰鋪砌月殘炎天聞覺冷窄地見疑寬
梢動勝搖扇枝低好掛冠碧籠煙冪冪珠灑雨珊珊

晚籜晴雲展陰芽蟄虺蟠愛從抽馬策惜未截魚竿

松韻徒煩聽桃夭不足觀梁慙當家杏臺陋本司蘭

古詩云盧家蘭室杏爲梁又秘書府即蘭臺也撐撥詩人興勾牽酒客歡靜

連蘆簟滑涼拂葛衣單豈止消時暑應能保歲寒莫

同凡草木一種夏中看

渭村酬李二十見寄

百里音書何太遲暮秋把得暮春詩柳條綠日君相
憶梨葉紅時我始知莫歎學官貧冷落猶勝村客病
支離形容意緒遙看取不似華陽觀裏時

初授贊善大夫早朝寄李二十助教

病身初謁青宮日衰貌新垂白髮年寂寞曹司非熱
地蕭條風雪是寒天遠坊早起常侵鼓瘦馬行遲苦

費鞭一種共君官職冷不如猶得日高眠

欲與元八卜隣先有是贈

平生心迹最相親欲隱墻東不爲身明月好同三徑
夜綠楊宜作兩家春每因暫出猶思伴豈得安居不
擇隣何獨終身數相見子孫長作隔墻人

遊城南留元九李二十晚歸

老遊春飲莫相違不獨花稀人亦稀更勸殘杯看日
影猶應趁得鼓聲歸

廣宣上人以應制詩見示因以贈之詔許上

人居安國寺紅樓院以詩供奉

道林談論惠休詩一到人天便作師香積筵承紫泥
詔昭陽歌唱碧雲詞紅樓許住請銀鑰翠輦陪行蹋

玉墀惆悵甘泉曾侍從與君前後不同時

重過秘書舊房因題長句

時爲贊善大夫

閣前下馬思徘徊第二房門手自開昔爲白面書郎
去今作蒼頭贊善來吏人不識多新補松竹相親是
舊我應有題墻名姓在試將衫袖拂塵埃

重到城見元九七絕句

容貌一日減一日心情十分無九分每逢陌路猶嗟
嘆何況今朝是見君

高相宅

青苔故里懷恩地白髮新生抱病身涕淚雖多無哭
處永寧門館屬他人

張十八

諫垣幾見遷遺補憲府頻聞轉殿監獨有詠詩張太
祝十年不改舊官銜

劉家花

劉家牆上花還發李十門前草又春處處傷心心始
悟多情不及少情人

裴五

莫怪相逢無笑語感今思舊戟明前張家伯仲偏相
似每見青楊一惘然

仇家酒

年年老去歡情少處處春來感事深時到仇家非愛
酒醉時心勝醒時心

恒寂師

舊遊分散人零落如此傷心事幾條會逐禪師坐禪
去一時滅盡定中消

靖安北街贈李二十

榆莢拋錢柳展眉兩人並馬語行遲還似往年安福
寺共君私試却迴時

重傷小女子

學人言語憑牀行嫩似花房脆似瓊纔知恩愛迎三
歲未辯東西過一生汝異下殤應殺禮吾非上聖詎
忘情傷心自歎鳩巢拙長墮春雛養不成

過顏處士墓

向墳通徑沒荒榛滿室詩書積闔塵長夜肯教黃壤
曉悲風不許白楊春簞瓢顏子生仍促布被黔婁死

更貧未曾悠悠上天意惜將富壽與何人

向世題周皓大夫新亭子二十二韻

東道常為主南亭別待賓規模何日創景致一時新
廣砌羅紅藥踈窓陰綠筠鑲開賓閣曉梯上妓樓春
置醴寧三爵加邊過八珍茶香飄紫筍膾縷落紅鱗
輝赫車輿開珍竒鳥獸馴獼猴看擺馬鸚鵡喚家人
錦額簾高捲銀花盞慢巡勸嘗光祿酒許看洛川神
周兼光祿卿有
家妓數十人歛翠凝歌黛流香動舞巾裙翻綉瀉
鵝梳陷鈿麒麟笛怨音含楚箏嬌語帶秦侍兒催畫
燭醉客吐文茵投轄多連夜鳴珂便達晨入朝紆紫
綬待漏擁朱輪貴介交三事光榮照四隣甘濃將奉
客穩煖不緣身十載歌鐘地三朝節鉞臣愛才心個

儻敦舊禮殷勤門以招賢盛家因好事貧始知豪傑
意富貴為交親

賦得聽邊鴻

驚風吹起塞鴻群半拂平沙半入雲為問昭君月下
聽何如蘇武雪中聞

見楊弘貞詩賦因題絕句以自諭

賦句詩章妙入神末年三十即無身常嗟薄命形惟
悴若比弘貞是幸人

病中早春

今朝枕上覺頭輕強起堦前試脚行羶膩斷來無氣
力風痰惱得少心情煖銷霜瓦津初合寒減冰渠凍
不成唯有愁人髮間雪不隨春盡逐春生

送人貶信州判官

地僻山深古上饒土風貧薄道程遙不唯遷客須栖
屑見說居人也寂寥溪畔毒沙藏木弩城頭枯樹下
山魈若於此郡為卑吏刺史廳前又折腰

曲江醉後贈諸親故

郭東丘墓何年客江畔風光幾日春只合殷勤逐杯
酒不須踈索向交親中天或有長生藥下界應無不
死人除却醉來開口笑世間何事更關身

和元八侍御升平新居四絕句

時方與元八卜隣

看花屋

忽驚映樹新開屋却似當簷故種花可惜年年紅似
火今春始得屬元家

累土山

堆土漸高山意出終南移入戶庭間玉峯藍水應惆
悵恐見新山望舊山

元八舊居在藍田山

高亭

亭脊太高君莫拆東家留取當西山好看落日斜銜
處一片春嵐暎半環

松樹

白金換得青松樹君既先栽我不栽幸有西風易憑
仗夜深偷得好聲來

醉後却寄元九

蒲池村裏匆匆別灃水橋邊兀兀迴行到城門殘酒
醒萬重離恨一時來

重寄

蕭散弓驚鴈分飛，
劍化龍悠悠天地內。
不死會相逢。
李十一舍人松園飲小酌，
酒得元八侍御詩。
叙云在臺中推院有鞠獄之苦，
即事書懷。

因酬四韻

愛酒舍人開小酌，
能文御史寄新詩。
亂松園裡醉相憶，
古栢廳前忙不知。
早夏我當逃暑日，
晚衙君是慮囚時。
唯應清夜無公事，
新草亭中好一期。
元於升平宅立草亭
重到華陽觀舊居

憶昔初年三十二，
當時秋思已難堪。
若為重入華陽院，
病髮愁心四十三。

荅勸酒

莫怪近來都不飲，
幾迴因醉却沾巾。
誰料平生狂酒客，
如今變作酒悲人。

題王侍御池亭

朱門深鎖春池滿，
岸落薔薇水浸莎。
畢竟林塘誰是主，
主人來少客來多。

聽水部吳員外新詩因贈絕句

朱紱仙郎白雪歌，
和人雖少愛人多。
明朝說向詩家道，
水部如今不姓何。

雨夜憶元九

天陰一日便堪愁，
何況連宵雨不休。
一種雨中君最苦，
徧梁閣道向通州。

雨中携元九詩訪元八侍御

微之詩卷憶同開暇日多應不入臺好句無人堪共
詠衝泥蹋水就君來

贈楊秘書巨源

楊嘗有贈洛州詩云三刀夢益州一箭取遼城由是知名

早聞一箭取遼城相識雖新有故情清句三朝誰是
敵白鬚四海半為兄貧家薙草時時入瘦馬尋花處
處行不用更教詩過好折君官職是聲名

和武相公感韋令公舊池孔雀

同用深字

索寞少顏色池邊無主禽難收帶泥翅易結著人心
頂毳落殘碧尾花銷闔金放歸飛不得雲海故巢深
寄生衣與微之因題封上

淺色縠紗輕似霧紡花紗袴薄如雲莫嫌輕薄但知
著猶恐通州熱殺君

白牡丹

白花冷淡無人愛亦占芳名道牡丹應似東官白贊
善被人還喚作朝官

夢舊

別來老大苦修道鍊得離心成死灰平生憶念消磨
盡昨夜因何入夢來

戲題盧秘書新移薔薇

風動翠條腰嫋嫋露垂紅萼淚闌干移他到此須為
主不愛花人莫使看

曲江夜歸聞元八見訪

自入臺來見面稀班中遙得揖容輝早知相憶來相
訪悔待江頭明月歸

苦熱題恒寂師禪室

人人避暑走如狂，獨有禪師不出房。可是禪房無熱到，但能心靜即身涼。

微之到通州日授館未安，見塵壁間有數行字，讀之即僕舊詩，其落句云：綠水紅蓮一朶開，千花百草無顏色。然不知題者何人，也。微之吟歎不足，因綴一章，兼錄僕詩本，同寄省，其詩乃是十五年前初及第時贈長安妓人阿軟絕句，緬思往事，杳若夢中，懷舊感今，因酬長句。

十五年前似夢遊，曾將詩句結風流。偶助笑歌嘲阿軟，可知傳誦到通州。昔教紅袖佳人唱，今遣青衫司馬愁。惆悵又聞題處所，雨淋江館破牆頭。

得微之到官後書，備知通州之事，悵然有感，因成四章。

來書子細說通州，州在山根峽岸頭。四面千重火雲合，中心一道瘴江流。蟲蛇白晝攔官道，蚊蚋黃昏撲郡樓。何罪遣君居此地，天高無處問來由。

二

匡匡巔山萬仞餘，人家應似甌中居。寅年籬下多逢虎，亥日沙頭始賣魚。衣斑梅雨長須髮，米澁畝田不解鉏。努力安心過三考，已曾愁殺李尚書。

李實尚書先貶此州

身歿於彼處

三

人稀地僻醫巫少夏旱秋霖瘴瘡多老去一身須愛
惜別來四體得如何侏儒飽笑東方朔蕙苴讒憂馬
伏波莫遣沈愁結成病時時一唱濯纓歌

四

通州海內恓惶地司馬人間冗長官傷鳥有弦驚不
定卧龍無水動應難劔埋獄底誰深掘松偃霜中盡
令看舉目爭能不惆悵高車大馬滿長安

病中答招飲者

顧我鏡中悲白髮儘君花下醉青春不緣眼痛兼身
病可是樽前第二人

鷺子樓三首

并序

徐州故尚書張有愛妓曰眇眇善歌舞雅多風態予

爲校書郎時遊徐泗間張尚書宴予酒酣出眇眇以
佐歡歡甚予因贈詩云醉嬌勝不得風媚牡丹花盡
歡而去邇後絕不相聞迨茲僅一紀矣昨日司勳真
外郎張仲素績之訪予因吟新詩有燕子樓三首詞
甚婉麗詰其由爲眇眇作也績之從事武寧軍累年
頗知眇眇始末云尚書旣沒歸葬東洛而彭城有張
氏舊第第中有小樓名燕子眇眇念舊愛而不嫁居
是樓十餘年幽獨塊然于今尚在予愛績之新詠感
彭城舊遊因同其題作三絕句

滿窓明月滿簾霜被冷燈殘拂卧床燕子樓中霜月
夜秋來只爲一人長

二

鈿暈羅衫色似烟幾回欲著即潜然自從不舞霓裳
曲疊在空箱十一年

三

今春有客洛陽回曾到尚書墓上來見說白楊堪作
柱爭教紅粉不成灰

初貶官過望秦嶺自此後詩江州路上作

草草辭家憂後事遲遲去國問前途望秦嶺上回頭
立無限秋風吹白鬚

藍橋驛見元九詩詩中云江陵歸時逢春雪

藍橋春雪君歸日秦嶺秋風我去時每到驛亭先下
馬循墻遶柱覓君詩

韓公堆寄元九

韓公堆北澗西頭冷雨涼風拂面秋努力南行少惆
悵江州猶似勝通州

發商州

商州館裡停三日待得妻孥相逐行若比李三猶自
勝兒啼婦哭不聞聲

武關南見元九題山石榴花見寄

往來同路不同時前後相思兩不知行過關門三四
里榴花不見見君詩

紅鸚鵡商山路逢

安南遠進紅鸚鵡色似桃花語似人文章辯慧皆如
此籠檻何年出得身

題四皓廟

卧迹秦亂起安劉舒卷如雲得自由若有精靈應笑
我不成一事謫江州

罷藥

自學坐禪休服藥從他時復病沉沉此身不要全強
健強健多生人我心

白鷺

人生四十未全衰我爲愁多白髮垂何故水邊雙白
鷺無愁頭上亦垂絲

襄陽舟中

下馬襄陽郭移舟漢陰驛秋風截江起寒浪連天白
本是多愁人復此風波夕

江夜舟行

烟澹月濛濛舟行夜色中江鋪滿槽水帆展半檣風
叫曙嗷嗷鴈啼秋唧唧蟲只應催北客早作白鬚翁

紅藤杖

交親過滄別車馬到江迴唯有紅藤杖相隨萬里來
江上吟元八絕句

大江深處月明時一夜吟君小律詩應有水仙潛出
聽翻將唱作步虛詞

途中感秋

節物行搖落年顏坐變衰樹初黃葉日人欲白頭時
鄉國程程遠親朋處處辭唯憐病與老一步不相離

登郢州白雪樓

白雪樓中一望鄉青山簇簇水茫茫朝來渡口逢京

使說道烟塵近洛陽

時淮西寇未平

舟夜贈內

三聲猿後垂鄉淚一葉舟中載病身莫凭水窓南北望月明月闌揔愁人

逢舊

我梳白髮添新恨君掃青蛾減舊容應被傍人怪惆悵少年離別老相逢

曰口阻風十日

洪濤白浪塞江津處處迴事事迤世上方為失途客江頭又作阻風人魚鰕遇雨腥盈鼻蚊蚋和烟癢滿身老大光陰能幾日等閒曰口坐經旬

浦中夜泊

閣上江隄還獨立水風霜氣夜稜稜回看深浦停舟處蘆荻花中一點燈

盧侍御與崔評事為予於黃鶴樓致宴宴罷

同望

江邊黃鶴古時樓勞致華筵待我遊楚思淼茫雲水冷商聲清脆管絃秋白花浪濺頭陀寺紅葉林籠鷓鴣洲揔是平生未行處醉來堪賞醒堪愁

舟中讀元九詩

把君詩卷燈前讀詩盡燈殘天未明眼痛滅燈猶閣坐逆風吹浪打船聲

舟行阻風寄李十一舍人

扁舟厭泊烟波上輕策閒尋浦嶼間虎蹋青泥稠似

印風吹白浪大於山且愁江郡何時到敢望京都幾
歲還今日料君朝退後迎寒新耐煖開顏李好小耐酒故云

雨中題衰柳

濕屈青條折寒飄黃葉多不知秋雨意更遣欲何如

題王處士郊居

半依雲渚半依山愛此令人不欲還負郭田園八九
頃向陽茅屋兩三間寒松縱老風標在野鶴雖饑飲
啄閒一臥江村來早晚著書盈帙髮毛斑

歲晚旅望

朝來暮去星霜換陰慘陽舒氣序牽萬物秋霜能壞
色四時冬日最凋年烟波半露新沙地鳥雀群飛欲
雪天向晚蒼蒼南北望窮陰離思兩無邊

晏坐閒吟

昔為京洛聲華客今作江湖潦倒翁意氣銷磨群動
裡形骸變化百年中霜侵殘髮無多黑酒伴衰顏只
暫紅賴學禪門非想定千愁萬念一時空

題李山人

厨無烟火室無妻籬落蕭條屋舍低每日將何療飢
渴井華雲粉一刃圭出式氣勢未留西

讀莊子

去國辭家謫異方中心自怪少憂傷為尋莊子知歸
處認得無河是本鄉

江樓偶宴贈同座

南浦閒行罷西樓小宴時望湖凭檻久待月放杯遲

江果嘗盧橘山歌聽竹枝相逢且同樂何必舊相知

放言五首并序

元九在江陵時有放言長句詩五首韻高而體律意古而詞新予每詠之甚覺有味雖前輩深於詩者未有此作唯李頎有云濟水至清河自濁周公大聖接輿狂斯句近之矣予出佐潯陽未屆所任舟中多暇又江上獨吟因綴五篇以續其意耳
朝真暮偽何人辯古往今來底事無但愛莊生能詐聖可知甯子解佯愚草螢有耀終非火荷露雖團豈是珠不取燔柴兼照乘可憐光彩亦何殊

二

世途倚伏都無定塵網牽纏卒未休禍福迴還車轉

數榮枯反覆手藏鉤龜靈未免剗腸患馬失應無折足憂不信君看奕棋者輸贏須待局終頭

三

贈君一法決狐疑不用鑽龜與祝著試玉要燒三日滿真玉燒三日不熱辨材須待七年期豫章木生七年而後知周公恐懼流言日王莽謙恭未篡時向使當時身便死一生真偽復誰知

四

誰家第宅成還破何處親賓哭復歌昨日屋頭堪炙手今朝門外好張羅北邙未省留閒地東海何曾有定波莫笑賤貧誇富貴共成枯骨兩如何

泰山不五

泰山不要欺毫末顏子無心羨老彭
松樹千年終是朽槿花一日自為榮
何須戀世常憂死亦莫嫌身漫厭
生去死來都是幻幻人哀樂繫何情
歲暮道情二首
壯日苦曾驚歲月長年都不惜光陰
為學空門平等法先齊老少死生心

二王半齋未竟却向東
半故青衫半白頭
雪風吹面上江樓
禪功自見無人覺
合是愁時亦不愁

讀李杜詩集因題卷後

翰林江左日負外
劔南時不得高官職
仍逢苦亂離暮年逋客恨
浮世謫仙悲吟詠流千古
聲名動四夷

文場供秀句樂府待新辭
天意君須會人間要好詩

賀鑑知章目李白為謫仙人

強酒

若不坐禪銷妄想即須吟醉放狂歌
不然秋月春風夜爭那閒思往事何

獨樹浦雨夜寄李六郎中

忽憶兩家同里巷何曾一處不追隨
閒遊預筭分朝日靜語多同待漏時
花下放狂衝黑飲燈前起坐徹明棋
可知風雨孤舟夜蘆葦叢中作此詩

聽崔七妓人箏

花臉雲鬟坐玉樓十三絃裡一時愁
憑君向道休彈

白盡江州司馬頭

望江州

江迴望見雙華表知是潯陽西郭門猶去孤舟三四
里水烟沙雨欲黃昏

初到江州

潯陽欲到思無窮庾亮樓南湓口東樹木凋疎山雨
後人家低濕水烟中菰蔣餒馬行無力蘆荻編房臥
有風遙見朱輪來出郭相迎勞動使君公

醉後題李馬二妓

行搖雲髻花鈿節應似霓裳趁管絃艷動舞裙渾是
火秋凝歌黛欲生烟有風縱道能迴雪無水何由忽
吐道疑是兩般心未決雨中神女月中仙

盧侍御小妓乞詩座上留贈

會入開

鬱金香汗裛歌巾山石榴花染舞裙好似文君還對
酒勝於神女不歸雲夢中那及覺時見宋玉荆王應
羨君

白氏文集卷第十五

白氏文集卷第十六

律詩

五言七言自兩韻至一百韻凡一百首

東南行一百韻寄通州元九侍御澧州李十

一舍人果州崔二十二使君開州韋大貲

外庾三十二補闕杜十四拾遺李二十助

教員外竇七校書

南去經三楚東來過五湖山頭看候館水面問征途
地遠窮江界天低極海隅飄零同落葉浩蕩似乘桴
漸覺鄉原異深知土產殊夷音語嘲哳蠻態笑睢盱
水市通闌闌烟村混舳舻吏徵魚戶稅人納火田租
亥日饒鰕螯寅年足虎驅成人男作非似鬼女為巫
樓閣攢猖婦隄喧簇貶夫夜船論鋪賃春酒斷甌沽

見果多盧橘聞禽悉鷓鴣山歌猿獨叫野哭鳥相呼
嶺微雲成棧江郊水當郭月橋翹柱鶴風汎鮎檣烏
鼇礙潮無信蛟驚浪不虞鼉鳴泉窟室蜃結氣浮圖
樹裂山魃穴沙含水弩樞喘牛犁紫芋羸馬放青菰
繡面誰家婢鷓頭幾歲奴泥中採菱芡燒後拾樵蘇
鼎臚愁烹鼈盤腥厭膾鱸鐘儀徒戀楚張翰浪思吳
氣序涼還熱光陰旦復晡身方逐萍梗年欲近桑榆
渭北田園廢江西歲月徂憶歸恒慘澹懷舊忽踟躕
自念咸秦客嘗為鄒魯儒蘊藏經國術輕棄度關繻
賦力凌鸚鵡詞鋒敵輓轡戰文重掉鞅射策一彎弧
崔杜鞭齊下元韋轡並驅名聲逼楊馬交分過蕭朱
世務輕磨揣周行竊覬覦風雲皆會合雨露各霑濡

共偶昇平代偏慙固陋軀承明連夜直建禮拂晨趨
美服頌王府珍羞降御廚議高通白虎諫切伏青蒲
栢殿行陪宴花樓忝看酺神旗張鳥獸天籟動笙竽
九劍星芒耀魚龍電策駘定場排漢旅促坐進吳歛
縹緲疑仙樂嬋娟勝畫圖歌鬟低翠羽舞汗墮紅珠
別選閒遊伴潛招小飲徒一杯愁已破三盞氣彌麤
軟美仇家酒幽閒葛氏姝十千方得斗二八正當壚
論笑杓胡律談憐鞏囁嚅李酣猶短竇庾醉更蕩迂
案馬呼教住骰盤喝遣輸長驅波卷白連擲采成盧
駝盤卷白波莫走籌併頻逃席航嚴列置盂滿卮那
鞍馬皆當時酒令可灌頹玉不勝扶入視中樞草歸乘內廐駒醉曾衝
宰相驕不揖金吾日近恩雖重雲高勢却孤翻身落

霄漢失脚倒泥塗博望移門籍潯陽佐郡符予自太

大夫出為時情變寒暑世利算錙銖即日辭雙闕明

朝別九衢播遷分郡國次第出京都十年春微之移

予出佐潯陽明年冬杪秦嶺馳三驛商

山上二邗南山險道中崐陽亭寂寞夏口路崎嶇六

道全生棘中丁盡執爨江關未徹警淮寇尚稽誅淮

西未平路經襄郡林對東西寺山分大小姑東林西

廬山北太姑小姑在廬峯蓮刻削湓浦帶縈紆蓮花

廬山南彭蠡湖中九派吞青草潯陽江

廬山北湓水在江城南何詩

通青草孤城覆綠蕪南方城壁黃昏鐘寂寂清曉角

鳴鳴春色辭門柳秋聲到井梧殘芳悲鷓鴣音啼决

暮節感茱萸藥拆金英菊花飄雪片蘆波紅日斜沒

沙白月平鋪幾見林抽笋頻驚燕引雛歲華何倏忽

年少不須更眇默思千古蒼茫想八區孔窮緣底事

顏天有何辜龍智猶經醢龜靈未免剝窮通應已定

聖哲不能逾況我身謀拙逢他厄運拘漂流隨大海

鎚鍛任洪爐險阻嘗之矣栖遲命也夫沈冥消意氣

窮餓耗肌膚防瘴和殘藥迎寒補舊襦書牀鳴蟋蟀

琴匣網踟躕貧室如懸磬端憂劇守株時遭人指點

數被鬼揶揄兀兀都疑夢昏昏半是愚女驚朝不起

妻怪夜長吁萬里拋朋侶三年隔友于自然悲聚散

不是恨榮枯去夏微之虐今春席八殂天涯書達否

泉下哭知無去年間元九瘡書去竟未報今春謾寫

因愁減衰容與病俱相逢應不識滿頷白髭鬚

謫居

面瘦頭班四十四遠謫江州爲郡吏逢時棄置從不
才未老衰羸爲何事火燒寒澗松爲燼霜降春林花
委地遭時榮悴一時間豈是昭昭上天意

初到江州寄翰林張李杜三學士

早攀霄漢上天衢晚落風波委世途雨露施恩無厚
薄蓬蒿隨分有榮枯傷禽側翅驚弓箭老婦低顏事
舅姑碧落三仙曾識百年深記得姓名無

庾樓曉望

獨憑朱檻立凌晨山色初明水色新竹霧曉籠銜嶺
月蘋風煖送過江春子城陰處猶殘雪衙鼓聲前未

有塵三百年來庾樓上曾經多少望鄉人

宿西林寺

木落天晴山翠開愛山騎馬入山來心知不及柴桑

令一宿西林便欲回

柴桑令劉遺民是也

江樓宴別

樓中別曲催離酌燈下紅裙間綠袍縹緲楚風羅綺
薄錚鏦越調管絃高寒流帶月澄如鏡夕吹和霜利
侶刀樽酒未空歡未盡舞腰歌袖莫辭勞

題山石榴花

一叢千朶壓欄干剪碎紅銷却作團風嫋舞腰香不
盡露銷粧臉淚新乾薔薇帶刺攀應懶齒莖生泥翫
亦難爭及此花簷戶下任人採弄盡人看

代春贈

山吐晴峰水放光
辛夷花白柳梢黃
但知莫作江西意
風景何曾異帝鄉

荅春

草烟低重水花明
從道風光似帝京
其柰山猿江上叫
故鄉無此斷腸聲

櫻桃花下嘆白髮

逐處花皆好
隨年貌自衰
紅櫻滿眼日
白髮半頭時
倚樹無言久
攀條欲放遲
臨風兩堪嘆
如雪復如絲
惜落花贈崔二十四
漠漠紛紛不柰何
狂風急雨兩相和
晚來悵望君知否
枝上稀疎地上多

移山櫻桃

亦知官舍非吾宅
且斲山櫻滿院栽
上佐近來多五考
少應四度見花開

官舍閒題

職散優閒地
身慵老大時
送春唯有酒
銷日不過茶
祿米麿牙稻
園蔬鴨脚葵
飽食晨晏起
餘暇弄龜兒

龜兒即小姪名

晚春登大雲寺南樓贈常禪師

花盡頭新白
登樓意若何
歲時春日少
世界苦人多
愁醉非因酒
悲吟不是歌
求師治此病
唯勸讀楞伽

北樓送客歸上都

憑高眺遠一悽悽
却下朱欄手共攜
京路人歸天直

北江樓客散日平西長津欲渡迴船尾殘酒重傾簇
馬蹄不獨別君須強飲窮愁自要醉如泥

北亭招客

踈散郡丞同野客幽閒官舍抵山家春風北戶千莖
竹晚日東園一樹花小盞吹醅嘗冷酒深爐敲火炙
新茶能來盡日觀棊否太守知情放晚衙

宿西林寺早起東林滿上人之會因寄崔二

十二頁外

謫辭魏闕鷓鴣隔老入廬山麋鹿隨薄暮蕭條投寺
宿凌晨清淨與僧期雙林我起聞鐘後隻日君趨入
閣時鵬鷲高低分皆定莫勞心力遠相思

遊寶稱寺

竹寺初晴日花塘欲晚春野猿疑弄客山鳥侶呼人
酒嫩傾金液茶新碾玉塵可憐幽靜地堪寄老慵身

早春聞提壺鳥因題鄰家

厭聽秋猿催下淚喜聞春鳥勸提壺誰家紅對先花
發何處青樓有酒沽進士龕豪尋靜盡拾遺風彩近
都無欲期明日東林醉變作騰騰一俗夫

見紫薇花憶微之

一叢暗澹將何比淺碧籠裙襯紫巾除却微之見應
愛人間少有別花人

薔薇花一叢獨死不知其故因有是篇

柯條未嘗損根發不曾移同類今齊茂孤芳忽獨萎
仍憐委地日正是帶花時碎碧初凋葉焦紅尚戀枝

乾坤無厚薄草木自榮衰欲問因何事春風亦不知
湖亭望水

久雨南湖漲新晴北客過日沉紅有影風定綠無波
岼沒閭闔少灘平船舫多可憐心賞處其柰獨遊何

閒遊

外事因慵廢中懷與靜期尋泉上山遠看筍出林遲
白石磨樵斧青竿理釣絲澄清深淺好最愛夕陽時

憶微之傷仲遠

李三仲遠去年春喪

幽獨辭群久漂流去國賒只將琴作伴唯以酒爲家
感逝因看水傷離爲見花李三埋地底元九謫天涯
舉眼青雲遠回頭白日斜可能勝賈誼猶自滯長沙

過鄭處士

聞道移居村塢間竹林多處獨開關故來不是求他
事暫借南亭一望山

霖雨苦多江湖暴漲塊然獨望因題北亭

自作潯陽客無如苦雨何陰昏晴日少間悶睡時多
湖闊將天合雲低與水和籬根舟子語巷口釣人歌
霧鳥沉黃氣風帆楚白波門前車馬道一宿變江湖

春末夏初閒遊江郭二首

閒出乘輕屐徐行蹋軟沙觀魚傍溢浦看竹入楊家

溢浦多魚浦西有竹林迳穿籬筍籐飄落水花雨埋釣

楊侍郎宅多好竹舟小風颺酒旗斜嫩剥青菱角濃煎白茗茶淹留不

知夕城對欲栖鷗

柳影繁初合鶯聲澁漸稀早梅迎夏結殘絮送春飛
西日韶光盡南風暑氣微展張新小簾熨帖舊生衣
綠蟻杯香嫩紅絲餽縷肥故園無此味何必苦思歸

紅藤杖杖出南蠻

南詔紅藤杖西江白首人時時攜步月處處把尋春
勁健孤莖直踈圓六節勻火山生處遠瀘水洗來新
粗細纔盈手高低僅過身天邊望鄉客何日拄歸秦

風雨中尋李十一因題船上

匹馬來郊外扁舟在水濱可憐衝雨客來訪阻風人
小醯沽清醕行廚煮白鱗停杯看柳色各憶故園春

題廬山山下湯泉

一眼湯泉流向東浸泥澆草煖無功驪山溫水因何

事流入金鋪玉甃中

寄蘄州簟與元九因題六韻時元九鰥居

笛竹出蘄春霜刀劈翠筠織成雙鎖簟寄與獨眠人
卷作筒中布舒為席上玓滑如鋪薤葉冷似卧龍鱗
清潤宜乘露鮮華不受塵通州炎瘴地此物最關身

秋熱

西江風候接南威暑氣常多秋氣微猶道江州最涼
冷至今九月着生衣

題元八溪居

溪嵐漠漠對重重水檻山牕次第逢晚葉尚開紅躑
躅秋房初結白芙蓉聲來枕上千年鶴影落杯中五
老峰更媿殷勤留客意魚鮮飯細酒香濃

晚出西郊

散吏閒如客貧州冷似村早涼湖北岼殘照郭西門
嬾鑷從鬚白休醫任眼昏老來何所用少與不多言

階下蓮

葉展影翻當砌月花開香散入簾風不如種在天池
上猶勝生於野水中

端居詠懷

賈生俟罪心相似張翰思歸事不如斜日早知驚鵬
鳥秋風悔不憶鱸魚胸襟曾貯匡時策懷袖猶殘諫
獵書從此萬緣都擺落欲攜妻子買山居

夜宿江浦聞元八改官因寄此詩

君遊丹陛已三遷我汎滄浪欲二年劒珮曉趨雙鳳

闕烟波夜宿一漁船交親盡在青雲上鄉國遙拋白
日邊若報生涯應笑殺結茅栽芋種畬田

百花亭

朱檻在空虛涼風八月初山形如峴首江色似桐廬
佛寺乘船入人家枕水居高亭仍有月今夜宿何如

江樓早秋

南國雖多熱秋來亦不遲湖光朝霽後竹氣晚涼時
樓閣宜佳客江山入好詩清風水蘋葉白露木蘭枝
欲作雲泉計須營伏臘資匡廬一步地官滿更河之

送客之湖南

年年漸見南方物事事堪傷北客情山鬼趨跳唯一
足峽猿哀怨過三聲帆開青草湖中去衣濕黃梅雨

裡行別後雙魚難定寄近來潮不到湓城

百花亭晚望夜歸

百花亭上晚徘徊雲影陰晴掩復開
日色悠揚映山盡雨聲蕭颯渡江來
髮毛遇病雙如雪心緒逢秋一似灰
向夜欲歸愁未了滿湖明月小船迴

西樓

小郡大江邊危樓夕照前青蕪早濕地
白露次寥天鄉國此時阻家書何處傳
仍聞陳蔡戍轉戰已三年尋李道士山居兼呈元明府

盡日行還歇遲遲獨上山攀藤老筋力照水病容顏
陶巷招居住茅家許往還飽諳榮辱事無意戀人間
四十五

行年四十五兩鬢半蒼蒼清瘦詩成癖粗豪酒放狂
老來猶委命安處即爲鄉或擬廬山下來春結草堂
寄李相公崔侍郎錢舍人

曾陪鶴馭兩三仙親侍龍輿四五年天上歡華春有限
世間漂泊海無邊榮枯事過都成夢憂喜心忘便是禪
官滿更歸何處去香爐峰在宅門前

廳前桂

天台嶺上凌霜對司馬廳前委地叢一種不生明月裡
山中猶校勝塵中

尋王道士藥堂因有題贈

行行覓路綠松嶠步步尋花到杏壇白石先生小有洞
黃芽姹女大還丹常悲東郭千家塚欲乞西山五

色丸但恐長生須有籍仙臺試爲檢名看

秋晚

籬菊花稀砌桐落對陰離離日色薄單幕踈簾貧寂
冥涼風冷露秋蕭索光陰流轉忽已晚顏色凋殘不
如昨萊妻臥病月明時不搗寒衣空搗藥

南浦歲暮對酒送王十五歸京

臘後冰生覆溢水夜來雲闇失廬山風飄細雪落如
米索索蕭蕭蘆葦間此地二年留我住今朝一酌送
君還相看漸老無過醉聚散窮通摠是閒

除夜

薄晚支頤坐中宵枕臂眠一從身去國再見日周天
老度江南歲春拋渭北田潯陽來早晚明日是三年

聞李十一出牧澧州崔二十二出牧果州因

寄絕句

平生相見即眉開靜念無如李與崔各是天涯爲刺
史緣何不覓九江來

元和十三年淮寇未平詔停歲仗憤然有感
率爾成章

聞停歲仗軫皇情應爲淮西寇未平不分氣從歌裡
發無明心向酒中生愚計忽思飛短檄狂心便欲請
長纓從來妄動多如此自笑何曾得事成

庾樓新歲

歲時銷旅貌風景觸鄉愁牢落江湖意新年上庾樓

上香爐峰

倚石攀蘿歇病身青筇竹杖白紗巾他時畫出廬山障便是香爐峰上人

憶微之

與君何日出屯蒙魚戀江湖鳥厭籠分手各拋滄海畔折腰俱老綠衫中三年隔闊音塵斷兩地飄零氣味同又被新年勸相憶柳條黃軟欲春風

雨夜贈元十八

卑濕沙頭宅連陰雨夜天共聽簷溜滴心事兩悠然把酒循環飲移牀曲尺眠莫言非故舊相識已三年

寒食江畔

草香沙暖水雲晴風景令人憶帝京還似往年春氣味不宜今日病心情聞鶯對下沈吟立信馬江頭取

次行忽見紫桐花悵望下邳明日是清明

三月三日登庾樓寄三十二

三日歡遊辭曲水二年愁卧在長沙每登高處長相憶何況茲樓屬庾家

聞李六景儉自河東令授唐鄧行軍司馬以詩賀之

誰能淮上靜風波聞道河東應此科不獨文詞供奉記定將談笑解兵戈泥埋劍戟終難久永借蛟龍何在多四十著緋軍司馬男兒官職未蹉跎

石楠對

可怜顏色好陰涼葉剪紅牋花撲霜傘蓋低垂金翡翠薰籠亂搭繡衣裳春芽細炷千燈焰夏藥濃焚百

和香見說上林無此對只教桃柳占年芳

柳一作李

大林寺桃花

人間四月芳菲盡山寺桃花始盛開長恨春歸無覓處不知轉入此中來

詠懷

自從委任順浮沉漸覺年多功用深面上減除憂喜色胸中消盡是非心妻兒不問唯耽酒冠帶皆慵只抱琴長笑靈均不知命江蘺叢畔苦悲吟

早發楚城驛

過雨塵埃滅沿江道徑平月乘殘夜出人趁早涼行寂歷間唵動冥濛闇思生荷塘翻露氣稻壟瀉泉聲宿犬聞鈴起栖禽見火驚曺曺烟樹色十里始天明

箬峴東池

箬峴亭東有小池早荷新荇綠參差中霄把火行人發驚起雙棲白鷺鷥

建昌江

建昌江水縣門前立馬教人喚渡船忽似往年歸蔡渡草風沙雨渭河邊

哭從弟

傷心一尉便終身叔母年高新婦貧一片綠衫消不得腰金拖紫是何人

香爐峰下新卜山居草堂初成偶題東壁五首

五架三間新草堂石堦桂柱竹編墻南簷納日冬天

煖北戶迎風夏月涼
灑砌飛泉纔有點拂
牕斜竹不成行
來春更葺東廂屋
紙閣蘆簾著孟光

二

喜入山林初息影
厭趨朝市久勞生
早年薄有烟霞志
歲晚深諳世俗情
已許虎溪雲裡臥
不爭龍尾道前行
從茲耳界應清淨
免見啾啾毀譽聲

三

長松對下小谿頭
斑鹿胎巾白布裘
藥圃茶園爲產業
野麋林鶴是交遊
雲生澗戶衣裳潤
嵐隱山廚火燭幽
最愛一泉新引得
清泠屈曲遶階流

四

日高睡足猶慵起
小閣重衾不怕寒
遺愛寺泉欹枕

聽香爐峰雪撥簾
看匡廬便是逃名地
司馬仍爲送老官
心泰身寧是歸處
故鄉何獨在長安

五

宦途自此心長別
世事從今口不言
豈止形骸同土木
兼將壽夭任乾坤
胸中壯氣猶須遣
身外浮雲何足論
還有一條遺恨事
高家門館未酬恩

山中問月

爲問長安月誰教
不暫離昔隨飛蓋
處今照入山時
借助秋懷曠留連
夜臥遲如歸舊鄉
國侶對好親知
松下行爲伴谿頭
坐有期千巖將萬
壑無處不相隨
正月十五日夜東
林寺學禪偶懷藍
田楊主簿因呈智
禪師

簿因呈智禪師

新年三五東林夕星漢迢迢鍾梵遲花縣當君行樂
夜松房是我坐禪時忽看月滿還相憶始嘆春來自
不知不覺定中微念起明朝更問鴈門師

臨水坐

昔爲東掖垣中客今作西方社內人手把楊枝臨水
坐閒思往事似前身

山居

山齋方獨往塵事莫相仍藍輿辭鞍馬緇徒換友朋
朝食唯藥菜夜伴只紗燈除却青衫在其餘便是僧

遺愛寺

弄石臨溪坐尋花遶寺行時時聞鳥語處處是泉聲
山中與元九書因題書後

憶昔封書與君夜金鑿殿後欲明天今夜封書在何
處廬山菴裡晚燈前籠烏檻猿俱未死人間相見是
何年

黃石巖下作

久別鵝鸞侶深隨鳥獸羣教他遠親故何處覓知聞
昔日青雲意今移向白雲

戲贈李十三判官

巫鞭相送醉醺醺遙見廬山指侶君想君初覺從軍
樂未愛香爐峰上人

醉中戲贈鄭使君

時使君先歸留妓樂重飲

密座移紅毯酡顏照綠杯雙娥留且住五馬任先迴
醉耳歌催醒愁眉笑引開平生少年興臨老斲重來



原件短缺

P16

江亭夕望

憑高望遠思悠哉
晚上江亭夜未迴
日欲沒時紅浪沸
月初生處白烟開
辭枝雪盡將春去
滿鑷霜毛送老來
爭敢三年作歸計
心知不及賈生才

酬元貞外三月三十日慈恩寺相憶見寄

悵望慈恩三月盡
紫桐花落鳥關關
誠知曲水春相憶
其柰長沙老未還
赤嶺猿聲催白首
黃茅瘴色換朱顏
誰言南國無霜雪
盡在愁人鬢髮間

偶然二首

楚懷邪亂靈均直
放棄合宜何惻惻
漢文明聖賈生賢
謫向長沙堪嘆息
人事多端何足怪
天文至信猶差忒
月離于畢合霧靄
有時不雨誰能測

雲黑雨條條
江昏水暗流
有風催解纜
無月伴登樓
酒罷無多興
帆開不少留
唯看一點火
遙認是行舟

登西樓憶行簡

每因樓上西南望
始覺人間道路長
礙日暮山青簇簇
浸天秋水白茫茫
風波不見三年面
書信難傳萬里腸
早晚東歸來下峽
穩乘船舫過瞿唐

羅子

有女名羅子
生來纔兩春
我今年已長
日夜二毛新
顧念嬌啼面
思量老病身
直應頭似雪
始得見成人

讀靈徹詩

東林寺裡西廊下
石片鐫題數首詩
言句怪來還校別
看名知是老湯師

聽李士良琵琶

人各賦二
十八字

聲似胡兒彈舌語愁如塞月恨邊雲間人
斲聽猶眉歛可使和蕃公主聞

昭君怨

明妃風貌最娉婷合在椒房應四星
只得當年備宮掖何曾專夜奉幃屏
見踈從道迷圖畫知屈那教配虜庭
自是君恩薄如紙不須一向恨丹青

一作命卑
如紙薄

閒吟

自從苦學空門法銷盡平生種種心
唯有詩魔降未得每逢風月一閒吟

戲問山石榴

小對山榴近劫栽半含紅萼帶花來
爭知司馬夫人

妬移到庭前便不開

編集拙詩成一十五卷因題卷末戲贈元九

李二十

一篇長恨有風情十首秦吟近正聲
每被老元偷格

律

元九向江陵日嘗以拙詩一軸贈行自後格變苦教短李伏歌行
李二十

歌行近見予樂府五十首默然心伏世間富貴應無分身後
文章合有

名莫怪氣粗言語大新排十五卷詩成

湖上閒望

藤花浪拂紫茸條菰葉風翻綠剪刀
閒弄水芳生楚思時時合眼詠離騷

白氏文集卷第十六

白氏文集卷第十七

律詩五言七言自兩韻至五十韻凡一百首

江南謫居十韻

白晒沉冥客曾為獻納臣壯心徒許國薄命不如人
纒展凌雲翅俄成失水鱗葵枯猶向日蓬斷欲辭春
澤畔長愁地天邊欲老身蕭條殘活計冷落舊交親
草合門無徑烟消甑有塵憂方知酒聖貧始覺錢神
虎尾難容足羊腸易覆輪行藏與通塞一切任陶鈞

江樓夜吟元九律詩成三十韻

昨夜江樓上吟君數十篇詞飄朱檻底韻墜綠江前
清楚音諧律精微思入玄收將白雪麗奪盡碧雲妍
寸截金為句雙雕玉作聯八風淒間發五彩爛相宣

冰扣聲聲冷珠排字字圓文頭交比繡筋骨軟於綿
頽湧同波浪錚鏦過管絃醴泉流出地鈞樂下從天
神鬼聞如泣魚龍聽侶禪星迴疑聚散月落為留連
鴈感無鳴者猿愁亦悄然交流遷客淚停住賈人船
闇被歌姬乞潛聞思婦傳斜行題粉壁短卷寫紅箋
肉味經時忘頭風當日痊老張知定伏短李愛應顛
張十八籍李二十
紳皆攻律詩故云道屈才方振身閒業始專天教聲
烜赫理合命迤邐顧我文章劣知他氣力全功夫雖
共到巧拙尚相懸各有詩千首俱拋海一邊白頭吟
處變青眼望中穿酬荅朝妨食披尋夜廢眠老償文
債負宿結字因緣每嘆陳夫子陳子昂著感
興詩稱於世常嗟李
謫仙賀知章謂李
白為謫仙名高折人爵忌苦減天年李竟無
官陳亦

早不得當時遇空令後代憐相悲今若此滄浦與通
川

潯陽歲晚寄元八郎中庾三十二員外

閱水年將暮燒金道未成丹砂不冝死白髮自須生
病肺慙杯滿衰顏忌鏡明春深舊鄉夢歲晚故交情
一別浮雲散雙瞻列宿榮螭頭階下立龍尾道前行
封事頻聞奏除書數見名虛懷事僚友平步取公卿
漏盡雞人報朝迴幼女迎可憐白司馬老大在滄城
元九以綠絲布白輕裕見寄製成衣服以詩

報知

綠絲文布素輕裕珍重京華手自封貧友遠勞君寄
附病妻親為我裁縫袴花白侶秋雲薄衫色青於春

草濃欲著却休知不補折腰無復舊形容

寂寞清明日蕭條司馬家留錫和冷粥出火煮新茶

欲別能無酒相留亦有花南遷更何處此地已天涯

九江春望

森茫積水非吾土飄泊浮萍是我身身外信緣為活
計眼前隨事覓交親鑪烟豈異終南色溢草寧殊渭
北春此地何妨便終老譬如元是九江人

岸邊有草因而記之

晚題東林寺雙池

向晚雙池好初晴百物新裊枝翻翠羽濺水躍紅鱗
萍汎同遊子蓮開當麗人臨流一惆悵還憶曲江春

贈內子

白髮方興嘆青娥亦伴愁寒衣補燈下小女戲牀頭
閨澹屏幃故淒涼枕席秋貧中有等級猶勝嫁黔婁

送客春遊嶺南二十韻

因叙嶺南方物以論之并擬微之送崔二

十二之作

已訝遊何遠仍嗟別太頻離容君感促贈語我殷勤

迢遞天南面蒼茫海北濬訶陵國分界交趾郡為隣
蒼鬱三光晦温暘四氣勻陰晴變寒暑昏曉錯星辰

瘴地難為老蠻陬不易馴土民稀白首洞主盡黃巾

戰艦猶驚浪戎車未息塵

時黃家賊方動紅旗圍卉服紫綬

裹文身麵苦枕榔製漿酸橄欖新牙檣迎海船銅鼓

賽江神不凍貪泉煖無霜毒草春雲烟蟒虵氣刀劍

鱗魚鱗路足羈棲客官多謫逐臣天黃生颶母颶母如虹

欲大風雨黑長楓人楓人因夜雷雨迴使先傳語征

軒早返輪須防杯裏蠱南方蠱毒多置酒中莫愛橐中珎北與

南殊俗身將貨孰親嘗聞君子誠憂道不憂貧

自題

功名宿昔人多許寵辱斯須自不知一旦失恩先左
降三年隨例未量移馬頭覓角生何日石火敲光住
幾時前事是身俱若此空門不去欲何之

自悲

火宅煎熬地霜松摧折身因知羣動內易死不過人

尋郭道士不遇

郡中乞假來相訪洞裏朝元去不逢看院祗留雙白

入門惟見一青松藥爐有火丹應伏雲碓無人水

自春廬山中雲母多故以水碓欲問叅同契中事更期

何日得從容

潯陽春三首元和十二年作

春生

春生何處闌周遊海角天涯遍始休先遣和風報消
息續教啼鳥說來由展張草色長河畔點綴花房小
對頭若到故園應覓我為傳淪落在江州

春來

春來觸動故鄉情忽見風光憶兩京金谷蹋花香騎
入曲江碾草鈿車行誰家綠酒歡連夜何處紅樓睡
失明獨有不眠不醉客經春冷坐古湓城

春去

一從澤畔爲遷客，兩度江頭送暮春。
白髮更添今日髮，青衫不改去年身。
百川未有回流水，一老終無却少人。
四十六時三月盡，送春爭得不殷勤。

憶夢微之

十二年八月十二日夜

晨起臨風一惆悵，通川湓水斷相聞。
不知憶我因何事，昨夜三迴夢見君。

贈韋鍊師

潯陽遷客爲居士，身似浮雲心似灰。
上界女仙無嗜好，何因相顧兩徘徊。
共疑過去人間世，曾作誰家夫婦來。

問劉十九

綠螳新醅酒，紅泥小火爐。
晚來天欲雪，能飲一杯無。
得行簡書聞欲下峽，先以此寄。

朝來又得東川信，欲取春初發梓州。
書報九江聞暫喜，路經三峽想還愁。
瀟湘瘴霧加飡飯，灑灑驚波穩泊舟。
欲寄兩行迎爾淚，長江不肖向西流。

南湖早春

風迴雲斷雨初晴，返照湖邊暖復明。
亂點碎紅山杏發，平鋪新綠水蘋生。
翅低白鴈飛仍重，舌澁黃鸝語未成。
不道江南春不好，年年衰病減心情。

元十八從事南海欲出廬山臨別舊居有戀

泉聲之什因以投和兼伸別情

賢侯辟士禮從容，莫戀泉聲問所從。
雨露初承黃紙

詔烟霞欲別紫霄峰傷弓未息新驚鳥得水難留久
臥龍我正退藏君變化一杯可易得相逢

題韋家泉池

泉落青山出白雲紫村遶郭幾家分自從引作池中
水深淺方圓一任君

醉中對紅葉

臨風杪秋對對酒長年人醉貌如霜葉雖紅不是春
遣懷

羲和走馭趁年光不許人間日月長遂使四時都似
電爭教兩鬢不成霜榮銷枯去無非命壯盡衰來亦
是常已共身心要約定窮通生死不驚忙

點額魚

龍門點額意何如紅尾青鬢却返初見說在天行雨
苦爲龍未必勝爲魚

聞龜兒詠詩

憐渠已解詠詩章搖膝支頤學二郎莫學二郎吟太
苦纔年四十髮如霜

對酒

未濟卦中休卜命衆同契裡莫勞心無如飲此銷愁
物一餉愁消直萬金

東墻夜合對去秋爲風雨所摧今年花時悵

然有感

碧萸紅縷今何在風雨飄將去不回惆悵去年墻下
地今春唯有薺花開

病起

病不出門無限時今朝強出與誰期經年不上江樓
醉勞動春風颺酒旗

夢亡友劉太白同遊彰敬寺

三千里外卧江州十五年前哭老劉昨夜夢中彰敬
寺死生魂魄暫同遊

與果上人歿時題此訣別兼簡二林僧社

本結菩提香火社爲嫌煩惱電泡身不須惆悵從師
去先請西方作主人

贈寫真者

子騁丹青日予當醜老時無勞役神思更盡病容儀
迢遞麒麟閣圖功未有期區區尺素上焉用寫真爲

劉十九同宿

時淮寇初破

紅旗破賊非吾事黃紙除書無我名唯共嵩陽劉處
士圍碁賭酒到天明

十二年冬江西溫煖喜元八寄金石稜到因

題此詩

今冬臘後不嚴凝暖霧溫風氣上騰山脚崦中纔有
雪江流慢處亦無冰欲將何藥防春瘴只有元家金
石稜

閒意

不爭榮耀任沉淪日與時疎共道親北省朋僚音信
斷東林長老往還頻病停夜食閒如社慵擁朝裘煖
侶春漸老漸諳閒氣味終身不擬作忙人

送友人上峽赴東川辟命

見說瞿塘峽斜街豔瀕根難於尋鳥路險過上龍門
羊角風頭急桃花水色渾山迴若鼇轉舟入侶鯨吞
巖合愁天斷波跳恐地翻憐君經此去為感主人恩

夜送孟司功

潯陽白司馬夜送孟功曹江閣管絃急樓明燈火高
湖波翻侶箭霜草殺如刀且莫開征棹陰風正怒號

衰病

老辭遊冶尋花伴病別荒狂舊酒徒更恐五年三歲
後些些談笑亦應無

題詩屏風絕句

并序

十二年冬微之猶滯通州予亦未離湓上相去萬里

不見三年鬱鬱相念多以吟咏自解前後辱微之寄
示之什殆數百篇雖藏篋中永以為好不若置之座
右如見所思繇是掇律句中短小麗絕者凡一百首
題錄合為一屏風舉目會心叅若其人在於前矣前
輩作事多出偶然則安知此屏不為好事者所傳異
日作九江一故事爾因題絕句聊以獎之

相憶采君詩作障自書自勘不辭勞障成定被人爭
寫從此南中紙價高

荅微之

微之於閬州西寺手題予詩予又以
微之百篇題此屏上各以絕句報荅

君寫我詩盈寺壁我題君句滿屏風與君相遇知何
處兩葉浮萍大海中

偶宴有懷

遇興尋文客因歡命酒徒春遊憶親故夜會侶京都
詩思閒仍在鄉愁醉斲無狂來欲起舞慙見白鬚鬚
山中廌江州崔使君見寄

眷盼情無恨優容禮有餘三年爲部吏一半許山居
酒熟心相待詩來手自書庾樓春好醉明日且回車

山枇杷

深山老去惜年華况對東溪野枇杷火對風來翻絳
豔瓊枝日出曬紅紗回看桃李都無色映得芙蓉不
是花爭柰結根深石底無因移得到人家

聞李尚書拜相因以長句寄賀微之

憐君不久在通川知己新提造化權夔高定求才濟
世張雷應辨氣衝天那知淪落天涯日正是陶鈞海

內年冑向泥中拋折劔不收重鑄作龍泉

歲暮

窮陰急景坐相催壯齒韶顏去不回舊病重因年老
發新愁多是夜長來膏明自蕪綠多事鴈默先烹爲
不才禍福細尋無會處不如且進手中杯

雨中赴劉十九二林之期及到寺劉已先去

因以四韻寄之

雲中臺殿泥中路旣阻同遊懶却還將謂獨愁猶對
雨不知多興已尋山纔應行到千峯裡只校來遲半
日間最惜杜鵑花爛熳春風吹盡不同攀

薔薇正開春酒初熟因招劉十九張大夫崔

二十四同飲

甕頭竹葉經春熟階底薔薇入夏開似火淺深紅壓
架如飴氣味綠粘臺試將詩句相招去倘有風情或
可來明日早花應更好心期同醉卯時杯

李白墓

采石江邊李白墳遶田無限草連雲可憐荒壠窮泉
骨曾有驚天動地文但是詩人多薄命就中淪落不
過君

對酒

漫把參同契難燒伏火砂有時成白首無處問黃芽
幻世如泡影浮生抵眼花唯將綠醅酒且替紫河車
戲荅諸少年

顧我長年頭似雪饒君壯歲氣如雲朱顏今日雖欺

我白髮他時不放君

風雨夜泊

苦竹林邊蘆葦叢停舟一望思無窮青苔撲地連春
雨白浪掀天盡日風忽忽百年行欲半茫茫萬事坐
成空此生飄蕩何時定一縷鴻毛天地中

題崔使君新樓

憂人何處可銷憂碧甃紅欄溢水頭從此潯陽風月
夜崔公樓替庾公樓

山中戲問韋侍郎

我抱反雲志君懷濟世才常吟棲招隱那得入山來

贈曇禪師

夢中作

五年不入慈恩寺今日尋師始一來欲知火宅焚燒

苦方寸如今化作灰

寄微之

帝城行樂日紛紛天畔窮愁我與君
秦女笑歌春不見巴猿啼哭夜長聞
何處琵琶絃似語誰家高墮髻
如雲人生多少歡娛事那獨千分無一分

醉吟二首

空王百法學未得姹女丹砂燒即飛
事事無成身老也醉鄉不去欲何歸

二

兩鬢千莖新侶雪十分一盞欲如泥
酒狂又引詩魔發日午悲吟到日西

曉寢

轉枕重安寢回頭一欠伸
紙牕明覺曉布被煖知春
莫強踈慵性須安老大身
雞鳴猶獨睡不博早朝人

荅元八郎中楊十二博士

身覺浮雲無所著心同止水有何情
但知瀟灑踈朝市不要崎嶇隱姓名
盡日觀魚臨澗坐有時隨鹿上山行
誰能拋得人間事來共騰騰過此生

湖亭與行簡宿

潯陽少有風情客招宿湖亭盡却回
水檻虛涼風月好夜深唯共阿伶來

八月十五日夜湓亭望月

昔年八月十五夜曲江池畔杏林邊
今年八月十五夜湓浦沙頭水館前
西北望鄉何處是東南見月幾

迴圓臨風一嘆無人會今夜清光侶往年

贈江客

江柳陰寒新雨地塞鴻聲急欲霜天愁君獨向沙頭宿水遶蘆花月滿船

殘暑招客

雲截山腰斷風驅雨脚回早陰江上散殘熱日中來却取生衣着重拈卜簞開誰能淘晚熱閒飲兩三杯

潯陽秋懷贈許明府

霜紅二林葉風白九江波暝色投烟鳥秋聲帶雨荷馬閒無處出門冷少人過鹵莽還鄉夢依稀望闕歌共思除醉外無計柰愁何試問陶家酒新篘得幾多

九日醉吟

有恨頭還白無情菊自黃一爲州司馬三見歲重陽劍匣塵埃滿籠禽日月長身從漁父笑門任雀羅張問疾因留客聽吟偶置觴嘆時論倚伏懷舊數存亡柰老應無計醫愁或有方無過學王勣唯以醉爲鄉

問韋山人山甫

身名身事兩蹉跎試就先生問若何從此神仙學得否白鬚雖有未爲多

送蕭鍊師步虛詞十首卷後以二絕繼之

欲上瀛洲臨別時贈君十首步虛詞天仙若愛應相問可道江州司馬詩

二

花紙瑤緘松墨字把將天上共誰開試呈王母如堪

唱發遣雙成更取來

贈李兵馬使

身得貳師餘氣槩家藏都尉舊詩章江南別有樓船
將燕領虬鬚不姓楊

題遺愛寺前溪松

偃亞長松樹侵臨小石溪靜將流水對高共遠峰齊
翠蓋烟籠密花幢雪壓低與僧清影坐借鶴穩枝棲
筆寫形難侶琴偷韻易迷暑天風槭槭晴夜露淒淒
獨憇依為舍閒行遶作谿棟梁君莫採留著伴幽棲
廬山草堂夜雨獨宿寄牛二李七瘦三十二

員外

丹青攜手三君子白髮垂頭一病翁蘭省花時錦帳

下廬山雨夜草菴中終身膠漆心應在半路雲泥迹
不同唯有無生三昧觀榮枯一照兩成空

聞楊十二新拜省郎遙以詩賀

文昌新入有光輝紫界宮牆白粉闈曉日雞人傳漏
箭春風侍女護朝衣雪飄歌曲高難和鶴拂烟霄老
慣飛官職聲名俱入手近來詩客侶君稀

云不用更教詩過好折君官
職是聲名今故云俱入手

三月三日懷微之

良時光景長虛擲壯氣風情已闕銷忽憶同為校書
日每年同醉是今朝

贈韋八

辭君歲久見君初白髮驚嗟兩有餘容鬢別來今至

此心情料取合何如曾同曲水花亭醉亦共華陽竹
院居豈料天南相見夜哀猿瘴霧宿匡廬

春江閒步贈張山人

江景又妍和牽愁發浩歌晴沙金屑色春水翅塵波
紅簇交枝杏青含卷葉荷藉莎憐軟暖懃對愛婆娑
書信朝賢斷知音野老多相逢不閒語爭柰日長何

春聽琵琶兼簡長孫司戶

四絃不似琵琶聲亂寫真珠細撼鈴指底商風悲颭
颭舌頭胡語苦醒醒如言都尉思京國侶訴明妃厭
虜庭遷客共君相勸諫春腸易斷不須聽

吳宮詞

怨而不怒

一入吳王殿無人覩翠娥樓高時見舞宮靜夜聞歌

半露胸如雪斜迴臉侶波妍媸各有分誰敢妬恩多

送韋侍御量移金州司馬

時予官獨未出

春歡雨露同霑澤冬嘆風霜獨滿衣留滯多時如我
少遷移好處侶君稀臥龍雲到須先起蟄燕雷驚尚
未飛莫恨東西溝水別滄溟長短擬同歸

自到潯陽生三女子因詮真理用遣妄懷

宦途本自安身拙世累由來向老多遠謫四年徒已
矣晚生三女擬如何預愁嫁娶真成患細念因緣盡
是魔賴學空王治苦法須拋煩惱入頭陀

江西裴常侍以優禮見待又蒙贈詩輒叙鄙

誠用伸感謝

一從簪笏事金貂每借溫顏故折腰長覺身輕離泥

萍忽驚手重捧瓊瑤馬因回顧雖增價桐遇知音已
半焦他日秉鈞如見念壯心直氣未全銷

自江州司馬授忠州刺史仰荷聖澤聊書鄙

誠

炎瘴拋身遠泥塗索脚難網初鱗躑刺籠久翅摧殘
雷電頒時令陽和變歲寒移簪承舊念剖竹授新官
鄉覺前程近心隨外事寬生還應有分西笑問長安
除忠州寄謝崔相公
提拔出泥知力竭吹噓生翅見情深劒鋒缺折難衝
斗桐尾燒焦豈望琴感舊兩行年老淚慕恩一寸歲
寒心忠州好惡何須問鳥得辭籠不擇林

初授官蒙裴常侍贈鶻銜瑞草緋袍魚袋因

謝惠貺兼紆離情

新授銅符未著緋因君裝束始光輝惠深范叔綈袍
贈榮過蘇秦佩印歸魚綴白金隨步躍鶻銜紅綬遶
身飛明朝戀別朱門淚不敢多垂恐汗衣

洪州逢熊孺登

靖安院裡辛夷下醉笑狂吟氣最粗莫問別來多少
苦低頭看取白髭鬚

初著刺史緋荅友人見贈

故人安慰善爲辭五十專城道未遲徒使花袍紅侶
火其如蓬髮白如絲且貪薄俸君應惜不稱衰容我
自知銀印可憐將底用只堪歸舍嚇妻兒

又荅賀客

銀章暫假爲專城賀客來多懶起迎侶挂緋衫衣架
上朽株枯竹有何榮

別草堂三絕句

正聽山鳥向陽眠黃紙除書落枕前爲感君恩須暫
起爐峰不擬住多年

二

久眠褐被爲居士忽挂緋袍作使君身出草堂心不
出廬山未要勒移文

三

三間茅舍向山開一帶山泉遶舍迴山色泉聲莫惆
悵三年官滿却歸來

鍾陵餞送

翠幕紅筵高在雲歌鍾一曲萬家聞路人指點滕王
閣看送忠州白使君

潯陽宴別

此後忠州
路上作

鞍馬軍城外笙歌祖帳間乘潮發湓口帶雪別廬山
暮景牽行色春寒散醉顏共嗟炎瘴地盡室得生還

戲贈戶部李巡官

好語民曹李判官少貪公事且謀歡男兒未死爭能
料莫作忠州刺史看

行次夏口先寄李大夫

連山斷處大江流紅旆逶迤鎮上游幕下翱翔秦御
史軍前奔走漢諸侯曾陪劍履升鸞殿欲謁旌幢入
鶴樓假着緋袍君莫笑恩深始得向忠州

重贈李大夫

早接清班登玉陛同承別詔直金鑿鳳巢閣上容身
穩鶴鎖籠中展翅難流落多年應是命量移遠郡未
成官慙君獨不欺憔悴猶作銀臺舊眼看

對鏡吟

閒看明鏡坐清晨多病姿容半老身誰論情性乖時
事自想形骸非貴人三殿失恩宜放棄九宮推命合
漂淪如今所得須甘分腰珮銀龜朱兩輪

江州赴忠州至江陵以來舟中示舍弟五十

韻

昔作咸秦客常思江海行今來仍盡室此去又專城
典午猶爲幸分憂固是榮筭篋州乘送艤艤驛船迎

共載皆妻子同遊即弟兄寧辭浪跡遠且貴賞心并
雲展帆高掛颺馳棹迅征沂流從漢浦循路轉荆衡
山逐時移色江隨地改名風光近東早水木向前清
夏口烟孤起湘州雨半晴日煎紅浪沸月射白砂明
北渚寒留鴈南枝暖待鶯駢朱桃露萼點翠柳含萌
亥市魚鹽聚神林鼓笛鳴壺漿椒葉氣歌曲竹枝聲
繫纜^纜伶沙靜壘綸愛岍平水食紅粒稻野茹紫花菁
甌汎茶如乳臺粘酒侶餽膾長抽錦縷藕脆削瓊英
容易來千里斯須進一程未曾勞氣力漸覺有心情
臥穩添春睡行遲帶酒醒忽愁牽世網便欲濯塵纓
早接文場戰曾爭翰苑盟掉頭稱俊逸翹足取公卿
且昧隨時義徒輸報國誠衆排恩易失偏壓勢先傾

虎尾憂危切鴻毛性命輕燭蛾誰救護蚕繭自纏縈
歛手辭雙闕回眸望兩京長沙拋賈誼漳浦臥劉楨
鷓鴣鳴還歇蟾蜍破又盈年光同激箭鄉思極搖旌
潦倒親知笑衰羸舊識驚烏頭因感白魚尾爲勞頰
劍學將何用丹燒竟不成孤舟萍一葉雙鬢雪千莖
老見人情盡閒思物理精如湯探冷熱侶博鬪輸贏
險路應須避迷塗莫共爭此心知止足何物要經營
玉向泥中潔松經雪後貞無妨隱朝市不必謝寰瀛
但在前非悟期無後患嬰多知非景福少語是元亨
晦即全身藥明爲伐性兵昏昏隨世俗蠢蠢學黎氓
鳥以能言構龜緣入夢烹知之一何晚猶足保餘生

題岳陽樓

岳陽城下水漫漫獨上危樓倚曲欄春岼綠時連夢
澤夕波紅處近長安猿攀對立啼何苦鴈點湖飛渡
亦難此地唯堪圖畫障華堂張與貴人看

入峽次巴東

不知遠郡何時到猶喜全家此去同萬里工程三峽
外百年生計一舟中巫山暮足霑花雨隴水春多逆
浪風兩片紅旌數聲鼓使君艘上巴東

十年三月三十日別微之於灋上十四年三
月十一日夜遇微之於峽中停舟夷陵三
宿而別言不盡者以詩終之因賦七言十
七韻以贈且欲記所遇之地與相見之時
爲他年會晤張本也

澧水店頭春盡日送君上馬謫通川夷陵峽口明月
夜此處逢君是偶然一別五年方見面相攜三宿未
迴船坐從日暮唯長嘆語到天明竟未眠齒髮蹉跎
將五十關河迢遞過三千生涯共寄滄江上鄉國俱
拋白日邊往事渺茫都似夢舊遊零落半歸泉醉悲
灑淚春杯裡吟苦支頤曉燭前莫問龍鐘惡官職且
聽清脆好詩篇微之別來有新詩數百篇麗絕可愛別來只是成詩癖
老去何曾更酒顛各限王程須去任重開離宴貴留
連黃牛渡北移征棹白狗崖東卷別筵黃牛白狗皆峽中地名即與激之遇別之所也神女臺雲間繚繞使君灘水急潺湲風淒
暝色愁楊柳月弔宵聲哭杜鵑萬丈赤幢潭底日一
條白練峽中天君還秦地辭炎徼我向忠州入瘴烟

未死會應相見在又知何地復何年

題峽中石上

巫女廟花紅侶粉昭君村柳翠於眉誠知老去風情
少見此爭無一句詩

白氏文集卷第十七

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

